



Broj: 0101-4214/26  
Sarajevo, 20. 04. 2026. godine

Bosna i Hercegovina  
Federacija Bosne i Hercegovine  
Kanton Sarajevo  
**SKUPŠTINA KANTONA SARAJEVO**  
**n/r Gosp. Elvedin Okerić, predsjedavajući Skupštine Kantona Sarajevo**

Ul. Reisa Džemaludina Čauševića 1  
71000 Sarajevo


**Predmet:** Odgovor na zastupničko pitanje gđe. Sebije Izetbegović, zastupnice u Skupštini Kantona Sarajevo, *dostavlja se*

**Veza:** Vaš akt broj: 01-04-58637-64/25 od 09. 02. 2026. godine

Poštovani,

u skladu sa aktom navedenom u vezi, koji se odnosi na zastupničko pitanje gđe. Sebije Izetbegović, zastupnice u Skupštini Kantona Sarajevo, a u vezi sa procedurom izbora i napredovanja u akademka zvanja na Univerzitetu u Sarajevu, u nastavku dostavljamo odgovore kako slijedi:

1. U skladu sa odredbama Zakona o visokom obrazovanju Kantona Sarajevo, Statuta Univerziteta u Sarajevu i drugim relevantnim općim aktima Univerziteta u Sarajevu, konačnu odluku o izboru ili neizboru kandidata u akademsko zvanje, na prijedlog vijeća članice Univerziteta u Sarajevu, donosi Senat Univerziteta u Sarajevu.  
Postupak izbora odvija se kroz više faza, na način da vijeće članice prethodno utvrđuje prijedlog za raspisivanje konkursa za izbor u zvanje, u skladu sa usvojenim dinamičkim planom potreba za raspisivanje konkursa za tekuću akademsku godinu. Senat Univerziteta u Sarajevu daje saglasnost vijeću članice za raspisivanje konkursa, nakon čega vijeće članice imenuje komisiju za pripremanje prijedloga za izbor u akademsko zvanje. Navedena komisija sačinjava pisani izvještaj sa obrazloženim prijedlogom koji se upućuje vijeću članice. Vijeće članice utvrđuje prijedlog odluke o izboru ili neizboru kandidata i dostavlja ga, putem odgovarajućeg vijeća grupacije nauka/umjetnosti, Senatu na razmatranje i konačno odlučivanje.
2. Sastav komisija za pripremanje prijedloga za izbor u zvanja se utvrđuje u svakom pojedinačnom postupku odlukom vijeća članice. Komisiju imenuje vijeće članice, po okončanju konkursne procedure, na prijedlog dekana odnosno direktora članice. Imena članova komisije navode se u odluci o imenovanju komisije, kao i u zapisnicima sjednica nadležnih tijela članice, čime se osigurava formalna provjerljivost i institucionalna odgovornost.
3. Članovi komisije moraju ispunjavati Zakonom i Statutom propisane uslove, koji se cijene kumulativno u svakom konkretnom slučaju. To podrazumijeva da komisija ima najmanje tri člana, da većina članova bude iz uže naučne odnosno umjetničke oblasti za koju se kandidat bira, te da svi članovi budu birani



najmanje u isto ili više zvanje od onoga u koje se kandidat predlaže. Izuzetno, ukoliko nije moguće osigurati većinu članova komisije iz uže oblasti, vijeće članice može, uz obrazloženje, utvrditi odgovarajuću srodnu oblast. Zakonitost sastava komisije procjenjuje se na osnovu odluke o imenovanju i relevantnih akademskih referenci imenovanih članova.

4. Nadzor nad zakonitošću i pravilnošću provođenja postupka izbora u akademsko zvanje ostvaruje se kroz više nivoa institucionalne kontrole. U tom smislu vijeće članice vrši neposrednu kontrolu zakonitosti prijedloga komisije, dekan odnosno direktor članice odgovoran je za procesnu urednost i poštivanje rokova, dok stručne službe članice provjeravaju formalnu ispravnost prijave i prate urednost dokumentacije. Senat Univerziteta u Sarajevu osigurava završnu provjeru kroz odlučivanje o prijedlogu članice. O svakoj fazi postupka sačinjava se odgovarajuća dokumentacija, uključujući konkurs, odluku o imenovanju komisije, zapisnike sjednica, izvještaj komisije i konačnu odluku Senata Univerziteta u Sarajevu.
5. U postupcima izbora u akademska zvanja obavezno se primjenjuju važeći propisi koji uređuju ovu oblast, prije svega Zakon o visokom obrazovanju Kantona Sarajevo, Statut Univerziteta u Sarajevu, kao i drugi opći akti Univerziteta u Sarajevu. Svako odstupanje moguće je samo ukoliko je izričito predviđeno Zakonom ili Statutom, kao što je slučaj kod imenovanja članova komisije iz srodne oblasti (tačka 3).
6. Radi osiguranja transparentnosti postupka, izvještaj komisije objavljuje se na internet stranici članice najmanje sedam dana prije održavanja sjednice vijeća na kojoj se o njemu odlučuje. Zapisnici sjednica, odluke nadležnih tijela i obrazloženja predstavljaju službenu dokumentaciju i dostupni su na uvid u skladu sa pravilima o javnosti rada, pristupu informacijama i zaštiti ličnih podataka.
7. Za osiguranje jednakog tretmana svih kandidata odgovorna su sva tijela koja učestvuju u postupku. Vijeće članice odgovorno je za zakonito vođenje postupka na nivou članice, stručna komisija za dosljednu primjenu jednakih kriterija prema svim prijavljenim kandidatima, a Senat Univerziteta u Sarajevu za konačnu kontrolu zakonitosti i jednakosti u odlučivanju. Načelo jednakosti kandidata proizlazi iz općih načela univerzitetske autonomije, zakonitosti i zabrane diskriminacije, koja obavezuje sva tijela Univerziteta u Sarajevu.
8. Pitanje sukoba interesa razmatra se u svakom pojedinačnom postupku kroz primjenu načela nepristrasnosti, akademske etike i objektivnosti odlučivanja. Iako važeći propisi ne propisuju poseban jedinstveni obrazac izjave o sukobu interesa za svaki postupak izbora, mehanizmi prevencije obuhvataju obavezu pisane saglasnosti članova komisije, primjenu pravila akademske etike, te mogućnost izuzeća člana komisije ili osporavanja njenog sastava pred nadležnim tijelima Univerziteta/članice.

S poštovanjem,

REKTOR

- Naslovu
- Kabinetu Rektora Univerziteta u Sarajevu
- Generalni sekretar Univerziteta u Sarajevu
- Službi za pravne poslove Univerziteta u Sarajevu
- Internet stranica Univerziteta u Sarajevu
- U dokumentaciju Tima
- Arhivi